




主编 郑翔  
副主编 李宇宇 吴国富



江西歷代進士全傳

貳

上海古籍出版社

# 广丰县进士传

说明：广丰县，春秋战国时为吴、越、楚之地。秦朝为九江郡余汗县之地。东汉建安十五年，孙权分豫章郡置鄱阳郡，析余汗地置葛阳县，广丰之地属葛阳县，两晋、南北朝皆同。隋朝大业三年，葛阳改名弋阳，广丰县地属之。唐武德四年，改鄱阳为饶州，置上饶县，县内设永丰镇，因境内有永丰山而得名，即为广丰县之前身。武德七年，省上饶入弋阳，隶饶州。唐乾元元年，置信州，分上饶县之永丰镇，益以衢州须江县之西南地，设置永丰县，是为建县之始，隶信州。元和七年，省永丰县入上饶，复为镇。五代时，今广丰县地皆为信州上饶县永丰镇。北宋熙宁七年，永丰镇复为永丰县，仍隶信州。元朝永丰县属信州路。明朝永丰县隶属于广信府，清朝不变。雍正十年，因吉安府亦有永丰县，改广信府永丰县为广丰县。民国以来，广丰县曾直属于省，属豫章道，属第六行政区、上饶专区。今属上饶市。广丰县进士共计96人。其中唐代1人，宋代44人，元代3人，明代30人，清代18人。

## 唐 代

### 乾宁二年乙卯科(896)赵观文榜

王贞白

**【传记】**王贞白，广丰县人，乾宁二年乙卯科赵观文榜进士。（见《同治广信府志》卷七；《同治广丰县志》卷七误作“乾宁四年乙卯赵观文榜”）

王贞白，字有道，登乾宁二年进士。先是，崔凝典文衡，不协士论，上诏陆扆覆试武德殿，贞白果占优等，授校书郎。遭时不淑，隐居教授，以道学自任。其论有典则，动止合准绳，士风因之丕变，四方学者多宗师之，有《灵溪集》行于世。（《嘉靖永丰县志》卷四，参见《同治广丰县志》卷八）

贞白，字有道，信州永丰人也。乾宁二年登第。时榜下，物议纷纷，诏翰林学士陆扆于内殿覆试，中选，授校书郎，时登科后七年矣。郑谷以诗赠曰：“殿前新进士，阙下校书郎。”初，兰溪僧贯休雅得名，与贞白居去不远而未会，尝寄《御沟诗》，有云：“此波涵帝

泽,无处濯尘纓。”后会,语及此,休曰:“剩一字。”贞白拂袂而去。休曰:“此公思敏,当即来。”休书字于掌心,逡巡,贞白还曰:“‘此中涵帝泽’如何?”休以掌示之,无异所改,遂订深契。后值天王狩于岐,乃退居著书,不复干禄,当时大获芳誉。性恬和,明易象。手编所为诗三百篇及赋、文等,为《灵溪集》七卷,传于世。卒葬家山。贞白学力精赡,笃志于诗,清润典雅,呼吸间两获科甲,自致于青云之上,文价可知矣。深惟存亡取舍之义,进而就禄,退而保身,君子也。梁陶宏景弃官隐居三茅,国事必咨请,称“山中宰相”,号贞白。今王公慕其为人而云尔。(《唐才子传》卷一〇;参见《唐摭言》卷七,《直斋书录解题》卷一九)

## 宋代

### 元丰五年壬戌科(1082)黄裳榜

吴 荣

**【传记】**吴荣,广丰县人,元丰五年壬戌科黄裳榜进士。湖广御史。(见《同治广丰县志》卷七)

### 崇宁二年癸未科(1103)霍端友榜

叶 祀

**【传记】**叶祀,永丰县人。崇宁二年癸未科霍端友榜进士。(见《同治广丰县志》卷七,参见《同治广信府志》卷七)

### 大观三年己丑科(1109)贾安宅榜

施舜显

**【传记】**施舜显,广丰县人,大观三年己丑科贾安宅榜进士。提举江西路。(见《同治广丰县志》卷七,参见《同治广信府志》卷七)

施舜显,字彦光,大观中上舍第,累官提举江西路茶盐常平使,东牟王右史谓其以仁义笃于躬,虽位不称德,而闻风者悦之。其子炳卿,亦有文集。祀乡贤祠。(《同治广丰县志》卷八)

周 琛

**【传记】**周琛,广丰县人,大观三年己丑科贾安宅榜进士。鄜州知州,历官武都将军。(见《同治广丰县志》卷七,参见《同治广信府志》卷七)

何 白

**【传记】**何白,广丰县人,大观三年己丑科贾安宅榜进士。赐第。(见《同治广丰县志》卷七,参见《同治广信府志》卷七)

## 张叔夜

【传记】张叔夜，广丰县人，大观三年己丑科贾安宅榜进士。开封少尹。（见《同治广丰县志》卷七，参见《同治广信府志》卷七）

张叔夜，字嵇仲，侍中耆孙也。少喜言兵，以荫为兰州录事参军。州本汉金城郡，地最极边，恃河为固，每岁河冰合，必严兵以备，士不释甲者累月。叔夜曰：“此非计也。不求要地守之，而使敌迫河，则吾既殆矣。”有地曰大都者，介五路间，羌人入寇，必先至彼点集，然后议所向，每一至则五路皆竦。叔夜按其形势，画攻取之策，讫得之，建为西安州，自是兰无羌患。

知襄城、陈留县，蒋之奇荐之，易礼宾副使、通事舍人、知安肃军，言者谓太优，还故官。献所为文，知舒、海、泰三州。大观中，为库部员外郎、开封少尹。复献文，召试制诰，赐进士出身，迁右司员外郎。

使辽，宴射，首中的。辽人叹诧，求观所引弓，以无故事，拒不与。还，图其山川、城郭、服器、仪范为五篇，上之。从弟克公弹蔡京，京迁怒叔夜，摈司存微过，贬监西安草场。久之，召为秘书少监，擢中书舍人、给事中。时吏惰不度，凡命令之出于门下者，预列衔，使书名而徐填其事，谓之“空黄”。叔夜极陈革其弊。进礼部侍郎，又为京所忌，以徽猷阁待制再知海州。

宋江起河朔，转略十郡，官军莫敢婴其锋。声言将至，叔夜使间者觇所向，贼径趋海濒，劫巨舟十余，载卤获。于是募死士得千人，设伏近城，而出轻兵距海，诱之战。先匿壮卒海旁，伺兵合，举火焚其舟。贼闻之，皆无斗志，伏兵乘之，擒其副贼，江乃降。加直学士，徙济南府。山东群盗猝至，叔夜度力不敌，谓僚吏曰：“若束手以俟援兵，民无噍类，当以计缓之。使延三日，吾事济矣。”乃取旧赦贼文，俾邮卒传至郡，盗闻，果小懈。叔夜会饮樵门，示以闲暇，遣吏谕以恩旨。盗狐疑相持，至暮未决。叔夜发卒五千人，乘其惰击之，盗奔溃，追斩数千级。以功进龙图阁直学士、知青州。

靖康改元，金人南下，叔夜再上章乞假骑兵，与诸将并力断其归路，不报。徙邓州。四道置帅，叔夜领南道都总管。金兵再至，钦宗手札趣入卫。即自将中军，子伯奋将前军，仲熊将后军，合三万人，翌日上道。至尉氏，与金游兵遇，转战而前。十一月晦，至都，帝御南薰门见之，军容甚整。入对，言贼锋方锐，愿如唐明皇之避禄山，暂诣襄阳，以图幸雍。帝颔之。加延康殿学士。闰月，帝登城，叔夜陈兵玉津园，铠甲光明，拜舞城下。帝益喜，进资政殿学士，令以兵入城，俄签书枢密院。连四日，与金人大战，斩其金环贵将二人。帝遣使赍蜡书，以褒宠叔夜之事檄告诸道，然迄无赴者。城陷，叔夜被创，犹父子力战。车驾再出郊，叔夜因起居叩马而谏，帝曰：“朕为生灵之故，不得不亲往。”叔夜号恸再拜，众皆哭。帝回首字之曰：“嵇仲努力！”

金人议立异姓，叔夜谓孙傅曰：“今日之事，有死而已。”移书二帅，请立太子以从民望。二帅怒，追赴军中，至则抗请如初，遂从以北。道中不食粟，唯时饮汤。既次白沟，驭者曰：“过界河矣。”叔夜乃矍然起，仰天大呼，遂不复语。明日，卒，年六十三。讣闻，赠开府仪同

三司，谥曰忠文。（《宋史》卷三五三；参见《东都事略》卷一〇八《张叔夜》，《同治广丰县志》卷八）

### 绍兴十二年壬戌科(1142)陈诚之榜

王居中

【传记】王居中，广丰县人，绍兴十二年壬戌科陈诚之榜进士。（见《同治广丰县志》卷七，参见《同治广信府志》卷七）

徐 维

【传记】徐维，广丰县人，绍兴十二年壬戌科陈诚之榜进士。（见《同治广丰县志》卷七，参见《同治广信府志》卷七）

徐维，绍兴间进士，徐观《乡贤祠记》称维上书斥秦桧之奸。见《寰宇志》、《填海录》诸书。（《同治广丰县志》卷八）

徐椿年

【传记】徐椿年，广丰县人，绍兴十二年壬戌科陈诚之榜进士。（见《同治广丰县志》卷七，参见《同治广信府志》卷七）

徐椿年，字寿乡，绍兴进士，任宜黄主簿，以病授承奉郎致仕。从范阳张九成学，所著有《尚书本义》、《论语解》、《双溪集》，汪端明应辰亟称之。（《同治广丰县志》卷八，参见《宋元学案》卷四〇《主簿徐先生椿年》）

### 绍兴十五年乙丑科(1145)刘章榜

施 霆

【传记】施霆，广丰县人，绍兴十五年乙丑科刘章榜进士。（见《同治广丰县志》卷七；《同治广信府志》卷七作“贵溪人”）

施 霓

【传记】施霓，广丰县人，绍兴十五年乙丑科刘章榜进士。（见《同治广丰县志》卷七；《同治广信府志》卷七作“施辘，上饶人”）

叶师旦

【传记】叶师旦，广丰县人，绍兴十五年乙丑科刘章榜进士。光禄大夫。（见《同治广丰县志》卷七）

### 绍兴二十七年丁丑科(1157)王十朋榜

施师点

【传记】施师点，广丰县人，一作上饶县人，绍兴二十七年丁丑科王十朋榜进士。（见《同治广丰县志》卷七，参见《同治广信府志》卷七）

施师点，字圣与，上饶人。十岁通《六经》，十二能文。弱冠游太学，试每在前列，司业

高宏称其文深醇有古风。寻授以学职，以舍选奉廷对，调复州教授。未上，丁内艰。服除，为临安府教授。乾道元年，陈康伯荐，赐对，言：“历年屡下诏恤民，而惠未加浹。陛下轸念，惟恐一夫失所；郡邑搜求，惟恐财赋不集。毋惑乎日降丝纶，恩不沾被。细民既困于倍输，又困于非泛，重以岁恶，室且垂罄，租不如期，积多逋负。今明堂肆赦，户自四等以下，逋自四年以前，愿悉除免。”上曰：“非卿不闻此言。”诏从之。八年，兼权礼部侍郎，除给事中。时太子詹事已除，上又特令增员为二，命兼之。赐对，言：“比年人物骖骮，士气耗荼，当广储人材以待用。”上曰：“观卿所奏，公辅器也。”假翰林学士、知制诰兼侍读使金。致命金廷，立班既定，相仪者以亲王将至，命师点退位，师点屹立。相仪者请数四，师点正色曰：“班立已定，尚欲何为。”不肯少动。在廷相顾骇愕，知其有守，不敢复以为请。九年，使还，有言其事于上者，上嘉叹不已。及后金使贺正旦至阙，问馆伴：“师点今居何官？”馆伴宇文价于班列中指师点以示之，金使恍然曰：“一见正人，令人眼明。”十年，除端明殿学士、签书枢密院事。入奏，控免，上曰：“卿靖重有守，识虑深远，朕欲用卿久矣。”复诏兼参知政事，除参知政事兼同知枢密院事。师点尝同宰相奏事退，复同枢密周必大进呈，上曰：“适一二事卿等各陈所见，甚关大体。前此宰相奏事，执政不措辞，今卿等如此，深副所望。”必大奏：“祖宗时，宰执奏事自相可否，或至面相切责，退不相衔。自秦桧用事，执政畏避不敢言。今陛下虚心兼听，若只宰相奏事，何用执政为？”师点复奏：“臣敢不竭股肱之力。”上因谕之曰：“朕欲天下事日往来胸中，未尝释也。”先是，州郡上供或不以时进，立岁终稽考法，及是，主计臣有喜为督促者，乞不待岁终先期行之。画命已下，师点矍然曰：“此策若行，上下逼迫，民不聊生。”或谓：“令已出矣。”师点曰：“事有为天下病，惟恨更之不速。”即迫寝其议。枢密周必大举手贺师点曰：“使天下赤子不被其毒者，公之赐也。”一日，入对后殿，上曰：“朕前饮冰水过多，忽暴下，幸即平复。”师点曰：“自古人君当无事时，快意所为，忽其所当戒，其后未有不悔者。”上深然之。十三年，辞兼同知枢密院事。权提举国史院，权提举《国朝会要》。十四年，除知枢密院事。师点惓惓搜访人才，手书置夹袋中，谓蜀去朝廷远，人才难以自见，蜀士之贤者，俾各疏其所知，差次其才行、文学，每有除授，必列陈之。十五年春，以资政殿大学士知泉州，除提举临安府洞霄宫。绍熙二年，除知隆兴府、江西安抚使。师点尝谓诸子曰：“吾平生仕宦，皆任其升沉，初未尝容心其间，不枉道附丽，独人主知之，遂至显用。夫人穷达有命，不在巧图，惟忠孝乃吾事也。”三年，得疾薨，年六十九。赠金紫光禄大夫。有奏议七卷、制稿八卷、《东宫讲义》五卷、《易说》四卷、《史识》五卷、文集八卷。（《宋史》卷三八五；参见《水心文集》卷二四《故知枢密院事资政殿大学士施公墓志铭》，《江西出土墓志选编》之《资政殿大学士施师点圹志》。《广丰县志》卷八曰：“按，师点，史传皆载上饶人，但上、丰俱属信郡，今广丰四十四都有施村，所居故址尚存，且丘墓存焉。”）

## 乾道二年丙戌科(1166)萧国梁榜

徐 珣

【传记】徐珣，广丰县人，乾道二年丙戌科萧国梁榜进士。（见《同治广丰县志》卷七）

徐珣，字温甫，高宗朝进士。授辰州教授，为删定编修。转池州判官，有美政，寻致仕。三上宰相书，皆道义之言。所著有《语、孟、易解》，学者多宗其说，号止斋先生。（《同治广丰县志》卷八）

### 乾道八年壬戌科(1172)黄定榜

杨 炳

【传记】杨炳，广丰县人，乾道八年壬戌科黄定榜进士。（见《同治广丰县志》卷七，参见《同治广信府志》卷七）

吴 绍

【传记】吴绍，广丰县人，乾道八年壬戌科黄定榜进士。（见《同治广丰县志》卷七，参见《同治广信府志》卷七）

### 淳熙五年戊戌科(1178)姚颖榜

舒 杲

【传记】舒杲，广丰县人，淳熙五年戊戌科姚颖榜进士。（见《同治广丰县志》卷七，参见《同治广信府志》卷七）

舒杲，字彦升，以进士官国子监簿，叶通志其墓，谓“悃偈无华之士，莅官而官治，临民而俗美”。（《同治广丰县志》卷八）

### 淳熙十四年丁未科(1187)王容榜

施 栝

【传记】施栝，广丰县人，施师点长子，淳熙十四年丁未科王容榜进士。修职郎、福建路安抚司干办公事。（见《江西出土墓志选编》之《资政殿大学士施师点圹志》；《同治广丰县志》卷七作“淳熙二年乙未詹驎榜”，误；《同治广信府志》作“施括，上饶人”）

### 庆元五年己未科(1199)曾从龙榜

赵 适

【传记】赵适，广丰县人，庆元五年己未科曾从龙榜进士。（见《同治广丰县志》卷七，参见《同治广信府志》卷七）

### 庆元年间(1195—1200)

施 洙

【传记】施洙，广丰县人，庆元中赐进士，翰林修撰。（见《同治广丰县志》卷七）

施 浚

【传记】施浚，广丰县人，庆元中赐进士，翰林修撰。（见《同治广丰县志》卷七；《同治



广信府志》卷七记载：“据施氏呈送家藏抄本，内开庆元中赐进士施洙，官翰林修撰；施浚，官翰林侍读。查通志未载，故阙之。”

### 嘉泰二年壬戌科(1202)傅行简榜

周雷复

【传记】周雷复，广丰县人，嘉泰三年壬戌科傅行简榜进士。（见《同治广丰县志》卷七）

### 开禧元年乙丑科(1205)毛自知榜

吕志逊

【传记】吕志逊，广丰县人，开禧元年乙丑科毛自知榜进士。（见《同治广丰县志》卷七）

吕志逊，号雪斋。少颖异，下笔泉涌。开禧间登进士，射策大廷，敷奏详明，切中事理，擢优等。授秘书郎，检阅未既，投劾而归。构吟轩书院于岑山之巔，朝夕讽咏，悠然自得。（《同治广丰县志》卷八）

吴 珍

【传记】吴珍，广丰县人，开禧元年乙丑科毛自知榜进士。容州节度使。（见《同治广丰县志》卷七）

### 嘉定十六年癸未科(1223)蒋重珍榜

黄从龙

【传记】黄从龙，广丰县人，嘉定十六年癸未科蒋重珍榜进士。（见《同治广丰县志》卷七，参见《同治广信府志》卷七）

黄从龙，嘉定进士，为郢州推官。元兵入襄岷，郢当要冲，守将潜遁，从龙抱印登城，大呼曰：“张巡、许远之事，正在今日。”啮指血书“死战报国”四字，与子熙力战而死。祀忠义祠。（《同治广丰县志》卷八，参《宋季忠义录》卷九《黄从龙》，《宋史翼传》卷三一《黄从龙》）

赵 迅

【传记】赵迅，广丰县人，嘉定十六年癸未科蒋重珍榜进士。（见《同治广丰县志》卷七，参见《同治广信府志》卷七）

### 淳祐元年辛丑科(1241)徐俨夫榜

周天骐

【传记】周天骐，广丰县人，淳祐元年辛丑科徐俨夫榜进士。浙东提刑。（见《同治广丰县志》卷七；《同治广信府志》卷七作“按，周天骐，浙东提刑。前府志、通志俱未载，故阙之”。）

## 淳祐四年甲辰科(1244)留梦炎榜

俞 掞

【传记】俞掞，广丰县人，淳祐四年甲辰科留梦炎榜进士。广东提刑。（《同治广丰县志》卷七；《同治广信府志》卷七作“俞琰”）

俞掞，字伯华，淳祐进士，授广东提刑，持己廉洁，当时之廉吏碑，掞居其一。（《同治广丰县志》卷八）

周天骥

【传记】周天骥，广丰县人，淳祐四年甲辰科留梦炎榜进士。校书郎，两浙转运使。（见《同治广丰县志》卷七，参见《同治广信府志》卷七）

周天骥，字子德，登淳祐进士，授校书郎。尝从真文忠公学，文忠为作颖斋为二记勉之。（《康熙江西通志》卷三二）

周天骥，字子德，从西山真文忠学。文忠为作《颖斋》、《为学》二记勉之。登淳祐进士第，授校书郎，历官至两浙转运使。后弃官归隐河源，建书院一区，与陈克斋、赵章泉、徐榘埜、刘端明、汤息庵、赵崇榘讲学其中。元至正间祀乡贤祠。（《同治广丰县志》卷八；参见《真文忠公集》卷三五《跋周子德颖斋记》，《真文忠公集》卷二七《送周天骥序》，《宋元学案补遗》卷八一）

蒋定国

【传记】蒋定国，广丰县人，淳祐四年甲辰科留梦炎榜进士。工部员外郎，加赠吏部尚书。（见《同治广丰县志》卷七）

吕良才

【传记】吕良才，广丰县人，淳祐四年甲辰科留梦炎榜进士。（见《同治广丰县志》卷七）

吕良才，字贤甫，从真西山文忠公游，举淳祐进士，任善化县尉，社仓羨余，秋毫无取。当道交荐，改调京秩，辞归。（《同治广丰县志》卷八，参见《宋元学案补遗》卷八一）

刘 坦

【传记】刘坦，广丰县人，淳祐四年甲辰科留梦炎榜进士。（见《同治广丰县志》卷七）

## 淳祐十年庚戌科(1250)方逢辰榜

徐宗仁

【传记】徐宗仁，广丰县人，淳祐十年庚戌科方逢辰榜进士。（见《同治广丰县志》卷七；《同治广信府志》卷七作“上饶人”）

徐宗仁，字求心，信之永丰人。淳祐十年进士。历官为国子监主簿。开庆元年，伏阙上书曰：“赏罚者，军国之纲纪。赏罚不明，则纲纪不立。今天下如器之欹而未坠于地，存亡之机，固不容发。兵虚将惰，而力匮财殫，环亮四境，类不足恃；而所恃以维持人心、奔走

豪杰者，惟陛下赏罚之微权在耳。权在陛下，而陛下不知所以用之，则未坠者安保其终不坠乎？臣为此惧久矣。陛下当危急之时，出金币赐土田，授节钺，分爵秩，尺寸之功，在所必赏。故当悉心效力，图报万分可也。而自干腹之兵越江逾广以来，凡阅数月，尚未闻有死战阵、死封疆、死城郭者，岂赏罚不足以劝惩之耶？今通国之所谓佚罚者，不过丁大全、袁玠、沈燾、张镇、吴衍、翁应弼、石正则、王立爰、高铸之徒，而首恶则董宋臣也。是以廷绅抗疏，学校叩阍，至有欲借尚方剑为陛下除恶。而陛下乃释而不问，岂真欲爱护此数人而重拂千万人之心？天下之事势急矣，朝廷之纪纲坏矣。若误国之罪不诛，则用兵之士不勇。今东南一隅天下，已半坏于此数人之手，而罚不损其豪毛。彼方拥厚货，挟声色，高卧华屋，而使陛下与二三大臣焦心劳思，可乎？三军之在行者，岂不愤然不平曰：‘稔祸者谁欤？而使我捐躯兵革之间？’百姓之罹难者，岂不群然胥怨曰：‘召乱者谁欤？而使我流血锋镝之下？’陛下亦尝一念及此乎？”又极论边事，谓惠衰而威不振。论董宋臣盘固日久，蒙蔽日久。又请“使有言责者皆得以尽其言，则国论伸而国威振。臣虽屏处山林，亦有生气。”迁国子监丞、秘书省著作佐郎，主管崇禧观。迁考功郎官兼崇政殿说书，进读《敬天图》。迁太府少卿兼侍讲、兼侍立修注官，迁太常少卿兼国史编修、实录检讨。知宁国府。监察御史郭闾论罢。德祐元年，起授吏部侍郎兼中书门下检正诸房公事，兼提领丰储仓所，兼同修国史、实录院同修撰，侍左侍郎。乞假督府名称往本州同守臣防拓，不允。权礼部尚书兼益王府赞读。卫益王走海上，厓山兵败，死焉。（《宋史》卷四二五；参见《同治广丰县志》卷八，《宋史翼》卷三一）

### 周 璋

**【传记】**周璋，广丰县人，淳祐十年庚戌科方逢辰榜进士。（见《同治广丰县志》卷七）

## 宝祐四年丙辰科(1256)文天祥榜

### 赵崇械

**【传记】**赵崇械，广丰县人，宝祐四年丙辰科文天祥榜进士。（见《同治广丰县志》卷七，参见《同治广信府志》卷七）

赵崇械，登宝祐进士文信国榜，事实不传。祀乡贤祠。元徐观记称其救弊剔奸，见《填海录》及《郡选举志》。（《同治广丰县志》卷八）

### 赵崇榘

**【传记】**赵崇榘，广丰县人，宝祐四年丙辰科文天祥榜进士。（见《同治广丰县志》卷七，参见《同治广信府志》卷七）

赵崇榘，开庆进士。事实不传，祀乡贤祠，元徐观记称其捐躯报国，见《填海录》及《郡选举志》。（《同治广丰县志》卷八）

### 徐炎午

**【传记】**徐炎午，广丰县人，宝祐四年丙辰科文天祥榜进士。（见《同治广丰县志》卷

七,参见《同治广信府志》卷七)

徐炎午,谢叠山高弟也。登景定进士,授行军器监簿,添差建宁府通判,有善政,建人颂之。祀乡贤祠。(《同治广丰县志》卷八)

俞克堪

【传记】俞克堪,广丰县人,宝祐四年丙辰科文天祥榜进士。(见《同治广丰县志》卷七,参见《同治广信府志》卷七)

俞克堪,字用可,景定进士,令龙岩,有政绩。寻擢刑、工部架阁承直郎。平生恬静自守,无躁进心,常作诗以见志。祀乡贤祠。(《同治广丰县志》卷八)

### 景定三年壬戌科(1262)方山京榜

周天浩

【传记】周天浩,字子敬,周定父,广丰县人,景定三年壬戌科方山京榜进士。延平府尹。(见《同治广丰县志》卷七,参见《同治广丰县志》卷八《周定》)

韩观国

【传记】韩观国,广丰县人,景定三年壬戌科方山京榜进士。(见《同治广丰县志》卷七)

韩观国,字用宾,景定进士,授潭州录事。元兵下江南,顿师坚守,不下凡阅月。城陷,死之。(《同治广丰县志》卷八)

徐作式

【传记】徐作式,广丰县人,景定三年壬戌科方山京榜进士。(见《同治广丰县志》卷七)

### 咸淳七年辛未科(1271)张镇孙榜

徐正言

【传记】徐正言,广丰县人,咸淳七年辛未科张镇孙榜进士。(见《同治广丰县志》卷七)

徐直身

【传记】徐直身,广丰县人,咸淳七年辛未科张镇孙榜进士。(见《同治广丰县志》卷七)

俞月卿

【传记】俞月卿,广丰县人,咸淳七年辛未科张镇孙榜进士。(见《同治广丰县志》卷七;月卿一作“元卿”)

前县志所载宋进士吴荣、施震、施霓、叶师旦、施栝、周雷复、吕志逊、吴珍、蒋定国、吕良才、刘坦、徐宗仁、周璋、周天浩、韩观国、徐作式、徐正言、徐直身、俞元卿十九人,《通志》俱无,前郡志亦未登载,故阙之。(《同治广信府志》卷七)

## 元 代

### 至顺元年庚午科(1330)笃列图榜

#### 笃列图

【传记】笃列图，姓揭氏，广丰县人，至顺元年庚午科右榜进士第一人。（见《同治广丰县志》卷七，参见《同治广信府志》卷七）

笃列图，字彦诚。其父忠武侯镇信州，因得讖：“水打巷村园，永丰出状元。”遂家焉。生公，聪敏过人，随兄彦修大都路同知任，读书每过目，辄成诵。初领道州录事司事，至顺元年庚午策试蒙古榜进士第一，授南台御史，整肃百僚，奸宄慑伏。未几，以疾终，遗命：“治丧勿作佛事，为浮屠所惑。”得子二：沈、沈，皆名进士。（《同治广丰县志》卷八）

### 至正十四年甲午科(1354)薛朝晤榜

#### 揭 沈

【传记】揭沈，广丰县人，至正十四年甲午科薛朝晤榜进士。（见《同治广丰县志》卷七，参见《同治广信府志》卷七）

揭沈，笃列图长子，字伯洪，号懋夫。至正进士，丁伪汉之乱，晦迹丘园。明洪武初，以文学屡征不起，诚意伯刘基赠有山居图诗，又有金幼孜题《双魁堂记》。（《同治广丰县志》卷八）

### 至正二十年庚子科(1360)买住榜

#### 揭 沈

【传记】揭沈，广丰县人，至正二十年庚子科买住榜进士。（见《同治广丰县志》卷七，参见《同治广信府志》卷七）

揭沈，字伯方，号毅夫，笃列图次子。至正戊子进士，家居未仕。洪武间诏举文学，征荐应辟，授大同朔州路同知，转升福州知府。莅官廉慎，政化大行。擢江西等处行中书省郎中，饶、信咫尺，信原隶濠属，民病漕运。会浙江省余德让合疏于朝，改隶江右，民深德之。乞休归，讲学于本邑西山，士君子宗之。当道复荐授邑痒教谕，如吴原、俞燦、周祖泽辈俱出其门。胡俨墓表。（《同治广丰县志》卷八）

## 明 代

### 洪武十八年乙丑科(1385)丁显榜

#### 周尚墉

【传记】周尚墉，广丰县人，洪武十八年乙丑科丁显榜进士。黄州知府。（见《同治广丰县志》卷七，参见《同治广信府志》卷七）

周尚墉，字伯瑞，明洪武丙辰进士，授湖广黄州府知府，有善政。玉阳乡建阅阅世家坊。（《同治广丰县志》卷八）

### 永乐四年丙戌科(1406)林环榜

吕 奭

【传记】吕奭，广丰县人，永乐四年丙戌科林环榜进士。（见《同治广丰县志》卷七，参见《同治广信府志》卷七）

吕奭，字宗召，性敏慧，议论出人意表。甫弱冠，举进士。廷对，射策称旨，文皇帝赐归读书，以老其才。后起家为定州同知。（《同治广丰县志》卷八）

吕 晟

【传记】吕晟，广丰县人，永乐四年丙戌科林环榜进士。（见《同治广丰县志》卷七，参见《同治广信府志》卷七）

吕晟，字景熙，景泰进士。选庶吉士，授工部屯田主事，迁刑部郎。廖忠献庄委决滞狱，称其有讞断才。既以忧去，补南仪部，论劾驸马都尉赵辉冒服主祀罪，众惮其风节。出守夔州，时阉党监丞张庆奉使蜀，所至州县，公求赂遗，无敢抗者。晟以常礼遇之，不少假。庆知贿不可得，乃撈掠递运官至死，纵卒扰市肆。晟隶捕十数人，随疏庆贪暴诸状。诏三法司遣官就讯，当事者惧忤阉党，欲薄庆罪，晟引义责之，莫敢散法。疏请城夔，凿山引水，为建永固，民至令德之。后以论兵事忤巡抚张瓚意，以老疾勒罢，士论惜之。先是，晟从刑部丁外艰归，哀毁逾制，庐墓六年。信郡守徐文漳以闻，诏旌表其门。晚年谈道著书，有志当代礼乐，乃撰《乐律古义》，具疏，属其子祥曰：“我身后，汝当代上之，以毕吾志。”后祥录父遗疏上闻，不报。祀忠义祠。（《同治广丰县志》卷八）

### 天顺元年丁丑科(1457)黎淳榜

潘 珪

【传记】潘珪，广丰县人，天顺元年丁丑科黎淳榜进士。副使。（见《同治广丰县志》卷七，参见《同治广信府志》卷七）

潘珪，天顺进士。大理评事，历寺副。恭慎明敏，狱无冤滞，擢佥事，按部讞决，多称平允。升云南宪副，卒于官。（《同治广丰县志》卷八）

刘伯川

【传记】刘伯川，广丰县人，天顺元年丁丑科黎淳榜进士。汝州知州。（见《同治广丰县志》卷七，参见《同治广信府志》卷七）

刘伯川，字东之，天顺进士。逆珰曹吉祥怙夺门功，横甚，每朝会，故为戏侮以市权，纠仪者目慑之，不敢言。伯川举笏披吉祥颊至流血，朝仪肃然。选额当授台省郎，当事者嫌其刚直，抑除禹州守，有惠政，卒于官。州人祀之，太史吕怀作挽诗云：“玉殿初开晓日迟，豺狼当道触朝仪。星垣多少龙文剑，不及刘郎笏半枝。”祀乡贤祠。（《同治广丰县志》卷八）

## 天顺四年庚辰科(1460)王一夔榜

汪 贵

【传记】汪贵，广丰县人，天顺四年庚辰科王一夔榜进士。湖州同知。（见《同治广信府志》卷七；《同治广丰县志》卷七误作“潮州同知”）

公讳贵，字士达，姓汪氏，家广信永丰之严池。曾大父睢宁令，讳景文，大父讳伯京，父讳某，母某氏。公幼质美，年十三游郡庠。已而父歿，能佐其兄璋经纪家事，不废学业。景泰癸酉领荐于乡，天顺庚辰登进士第，观政礼部。以病告归，久之始起。坐前奉使时常覆舟毁，御批例外补，出知崇明。崇明岸海，多风鱼灾，且军民揉居，强弱不敌。公至，嘘枯掖仆，民力乃裕。再期，丁内艰归。服阕，值淳安令缺，内相商文毅公轸其乡邑，语吏部用公补之。邑多贵宦家，豪右或藉声势，挠令肆奸。治之严甚，皆自戢。岁屡侵，尽力赈之，民不病饥。吏胥盗官库物不贲，廉其党，悉抵法。考绩赴吏部者再，皆以最书。寻升湖州府同知，属县上供之赋，岁以数十万计，公催科有方，事集而民不扰。历五年，群民相率疏请补公郡守，则新守已除矣，事乃寝。未几，遂乞归，盖成化丙午岁也。弘治戊午九月十三日，年七十有八，以疾卒。配黄氏，早卒，无子。继室杨氏，子焯；梅氏，子炳、炜、炤；侧室施氏，子燦，凡五人。焯早世，炳、炤充邑庠生。女四人，长适邑人程桓，次适上饶郑琨，余尚幼。孙男五，女二。公为人诚朴，不饰言貌，衣食务自贬，以勤俭为子弟先。敦尚孝友，官淳安时，尝取道过家，亟创祠堂以奉先祀。兄早世，抚其二孤，均于己子，田庐即己所市，割以畀之，无所私。其施于家者如是，宜其居官从政之可纪也。炳将以己未十二月十一日葬公于墩丘山之原，奉公友陈郡博元纲所为状来速予铭。予念先伯父敏庵先世尝同公领乡荐，有世讲之好，谊不可让，乃序公行而铭之。铭曰：近实远华，用植其身。迁之于官，亦阜其民。德音不亡，视此贞珉。（明费宏《费宏集》卷一七《奉政大夫湖州府同知汪公墓志铭》）

## 成化十七年辛丑科(1481)王华榜

郑 轼

【传记】郑轼，广丰县人，成化十七年辛丑科王华榜进士。四川副使。（见《同治广丰县志》卷七，参见《同治广信府志》卷七）

郑轼，字式之，号大石，成化间进士。令余杭，以卓异征拜御史，出按湖广。常奏免南北尺籍以便戍伍，墨吏望风解绶。迁四川副使，告归，隐大石山，啸歌自适，因号大石翁。（《同治广丰县志》卷八）

## 弘治三年庚戌科(1490)钱福榜

郑 轼

【传记】郑轼，广丰县人，弘治三年庚戌科钱福榜进士。（见《同治广丰县志》卷七，参见《同治广信府志》卷七）

郑辄，字行之，性孝友，积学，淹通经史。由进士历官吏部文选郎，选署甚平，所简拔无阿徇，声望赫然。丁外艰归，庐墓至服阙不起，朝议重之，虚考功以待，檄有司敦促赴京。卒于官。祀乡贤祠。（《同治广丰县志》卷八）

## 周 序

**【传记】**周序，广丰县人，弘治三年庚戌科钱福榜进士。（见《同治广丰县志》卷七，参见《同治广信府志》卷七）

周序，字仲礼，弘治进士。授给事中，尝上书正君德、图治化八事，累数千言，上嘉纳焉。奉命视草场牧马，马多不及额，稍剪其鬃以杜欺罔。忌者因执剪马非法中之，大司马马端肃白给事无罪，固剔马政蠹耳，始解。又上疏请止佚游以恤边患，辞极剴切。迁太常丞，时给事中林廷玉言事忤旨被遣，无敢营救者，序独抗章，留之不报。以疾卒于官，吕翀行状。祀乡贤祠。（《同治广丰县志》卷八）

## 弘治十二年己未科(1499)伦文叙榜

### 吕 翀

**【传记】**吕翀，广丰县人，弘治十二年己未科伦文叙榜进士。（见《同治广丰县志》卷七，参见《同治广信府志》卷七）

吕翀，广信永丰人。弘治十二年进士。其请留健、迁言：“二臣不可听去者有五。孔子称孟庄子之孝，以不改父之臣为难。二臣皆先帝所简以遗陛下，今陵土未干，无故罢遣，何以慰在天之灵？不可一也。二臣虽以老疾辞，实由言违计沮，不得其职而去。陛下听之，亦以其不善将顺，非实有意优老也。在二臣得去就之义，在陛下有弃老成之嫌。不可二也。今民穷财殫，府藏虚罄，水旱盗贼、星象草木之变迭见杂出，万一祸生不测，国无老成，谁与共事？不可三也。自古刚正者难容，柔顺者易合。二臣既去，则柔顺之人必进，将一听陛下所为，非国家之福。不可四也。书曰‘无遗寿考’。健等谙练有素，非新进可侔，今同日去国，天下后世将谓陛下喜新进而厌旧人。不可五也。”既削籍归，后起云南佥事。迁四川副使，修成都江堰以资灌溉，水利大兴。嘉靖初卒。（《明史》卷一八八，参见《同治广丰县志》卷八）

## 弘治十五年壬戌科(1502)康海榜

### 吕 夔

**【传记】**吕夔，广丰县人，弘治十五年壬戌科康海榜进士。（见《同治广丰县志》卷七，参见《同治广信府志》卷七）

吕夔，字祖邦，夔郡守晟之孙也。生于夔州，遂名夔。弘治壬戌进士。主文欲授入翰林，令先谒首揆，执不往。授虞衡主事，出视仪真瓮厂，厘革弊端，晋员外郎。受知少师梁文毅，荐改选部郎中，铨核精明，声名益著。出知杭州府，政平讼理。丁外艰归，服除，筑莲湖书院，与朋侪徜徉其中老焉。（《同治广丰县志》卷八）



## 正德六年辛未科(1511)杨慎榜

### 郑 浙

【传记】郑浙，广丰县人，正德六年辛未科杨慎榜进士。（见《同治广丰县志》卷七，参见《同治广信府志》卷七）

郑浙，字文川，性倜傥不羁。少举进士，授大理寺评事，历官四川参议，以平寇例得叙功，遽告归，筑南田书舍，杜门谢客，吟咏不辍。丰人称宦途勇退，洒然有风格者无逾二郑。（《同治广丰县志》卷八）

### 夏尚朴

【传记】夏尚朴，广丰县人，正德六年辛未科杨慎榜进士。（见《同治广丰县志》卷七，参见《同治广信府志》卷七）

夏尚朴，字敦夫，广信永丰人。正德初，会试赴京。见刘瑾乱政，慨然叹曰：“时事如此，尚可干进乎？”不试而归。六年成进士，授南京礼部主事。岁饥，条上救荒数事。再迁惠州知府，投劾归。嘉靖初，起山东提学副使。擢南京太仆少卿，与魏校、湛若水辈日相讲习。言官劾大学士桂萼，语连尚朴。吏部尚书方献夫白其无私，寻引疾归。早年师谅，传主敬之学，常言“才提起，便是天理。才放下，便是人欲”。魏校亟称之。所著有《中庸语》《东岩文集》。（《明史》卷二八三，参见《同治广丰县志》卷八）

夏尚朴，字敦夫，号东岩。天性孝友，师事娄一斋，以汲养为功，时见诸吟咏，悠然自得。尝柄文山东，道范伟然，士风振。归家教训，士赖陶镛，郡邑皆知向学焉。若其不应进士第，与夫辞荣养亲、投劾不受官职，皆大节所在。历官至太仆少卿。所著有《中庸说语录》，文集若干卷。（《嘉靖永丰县志》卷四）

昔在南都，得领教左右，乃始知吾执事之学，以忠信为本，以践履为功，自求实得，不事虚谈，真得孔门教人之旨，扩而充之，将何所不至。视近时学者，饰其外而忘其中，浮于言而骛于行，相去奚翅倍蓰，此不肖所以深慕而敬服也。近者巡历南康，两诣白鹿洞书院，寻昔贤之遗迹，叹今昔盛衰之殊，重念江右多贤之地，当必有感而兴起焉者。乃以鄙见，条陈作兴之宜于抚按诸公之侧，慨然欲举而行之，咸以师道不得其人为虑。既乃有以执事言之，众啧啧称服，以为决非斯人不可。此固素行之在人，夫亦大方士子造就之机也。诸公欲即遣官，以币上请，恐失之遽，乃命不肖达其诚，俟不拒然后敢至。以执事饱学，未施弃官而归林谷，当推之以淑乡人，厚风化，夫亦执事之心也。且不肖亦得以时就海，益以自附于君子之列，兹又一人之私也。尝以谕诸生，择其学行志趣之可进于道，亦多唯唯而行者矣。凡所以处之之方，亦既详备，而所以道之之道，敬以俟执事，万勿固辞幸甚。两辱教，无任慰感，俗冗久失裁答，并此奉谢不备。某年月日贲亨再拜。（明高贲亨《与夏尚朴书》，见明夏尚朴《东岩集》卷四）

近承专使惠书，遥致抚按藩臬诸公之命，使主白鹿洞教事，生以薄力不足以当此责任之重，已作一书奉复，冀平昔知己，必能恳恳诸公之侧，使得遂所辞矣。不意复蒙敦遣教官莫华同生员熊梅等四人，远奉书币到山中，礼意诚恳，若终不予释者，岂不肖平昔深情厚貌